

摘藻堂四庫全書薈要

集部

欽定四庫全書薈要

集部

御選明詩卷四十五

詳校官原任主事臣李斯咏

欽定四庫全書薈要卷一萬八千五百四十四

集部

御選明詩卷四十四

七言古詩九

邊貢

贈尚子

意氣憑凌一當百
關西儒生五陵客
少年學書復學劍
老大蹉跎雙鬢白
門下諸生半賜麻
閨中小婦猶炊麥
布衣東來謁天子
春日醉臥長安陌
陌頭花絮夕紛紛

瓊閣如天隔紫雲浩歌翩然却歸去眼底誰是平原君

雨泊

蓮窩渡頭燕雙語楊柳蕭疎灑飛雨五日舟行一日程
客夢遭迴厭灣浦溪煙臥水澹不流沙草縈毛細難數
淹泊空灘歸意迷背雨來船自鳴櫓

送馬敬湖赴湖南提學

征馬帶落日出門君已遙層城不隔夢夜夜盧溝橋盧
溝橋邊車簇簇故人却在城南宿誰令相見轉多情翻

恨遲行不如速江漢風煙遲早春關山雨雪暗邊塵臨
歧莫動殊方感余亦東西南北人

題豐內翰愛鳧樓

春鳧呼其侶拍拍戲芳渚一鳧忽驚人羣鳧共高舉回
翔集城下點點散如雨愛鳧主人今幾秋夕陽空上望
高樓憑闌獨送千里目平沙莽莽寒煙綠

送秦用中文學

玉真臺下三間屋屋後有松前有竹廣文先生雙鬢禿

長對青藜夜深讀有時不巾亦不服獨跨瘦驢攜短僕
五老峯前看秋瀑有時芒鞋步江澳月落詩成江鬼哭
石底流泉手親掬歸來煮茗窗下宿清夢遽遽謝梁肉
鳥聲隔枕猿掛木紅日三竿睡初熟食罷曉盤歌首啗
為翦溪雲封尺牘長安故人勞遠目

張夏道中遇雨短歌示同行希尹諸子

南山北山雨如注寒風颯颯吹山樹中河水發行子愁
褰裳欲渡且復休黑霧蒼雲蔽村舍咫尺誰能辨牛馬

嗟哉出門百里行路難我今胡為在中野

康海

觀輿菜

汴東種菜菜已熟數畝輿來不盈櫝積陰地冷生意微
稀尠空教怪童僕連年種豆無一成苗稼雖強陰雨蝕
家口嗷嗷三十餘此菜安能佐饘粥往歲寧無恒雨時
不似今年太翻覆三月浸淫到仲秋天日不瞻魚走陸
農家處處守場禾官吏紛紛飽粱肉深山雪凍薪不來

男號女啼聲似逐水不潤下洪範嗔願以波濤注空谷
雨暘時若年歲豐我菜全無心亦足

王廷相

夔州簡盧朝寅

巴東山高水如注遊子東行徬歸路五月江平濫瀕堆
咫尺瞿塘誰敢渡峽裏雲霞日日新伏龍躍馬已成塵
清歌長嘯風流在且醉夔陽竹葉春

海上秋望

海城秋深風雨急出門欲往道沾澀溪壑蕭蕭鵝鷺寒
石潭漠漠蛟龍蟄長望望鄉雲不開中流書信何時來
會將畫舸千絲纜自作三江逆浪迴

朱應登

和西涯閣老寄題黃鶴樓韻兼呈秦鳳山中丞
樓船浮空向空泊坐對江樓詠孤鶴杲日晶晶目仍遠
澄波淼淼心先廓大別曾聞神禹鑿洞庭彭蠡相聯絡
黃緣七澤入溟海控引羣山俯飛閣飛閣西來千萬峯

釣天九奏敞龍宮
虛傳雲樹書能達
實少桃源路可通
靈洲處處聞芳杜
商舶時時乘便風
風波歲月坐超忽
回首朱顏成老翁
我生蹇劣慚時彥
踪跡天涯已強半
春草幽憂泣楚纍
秋風歸思懷張翰
支離歲月如轉蓬
廿載斯樓已三見
感慨長歌崔老篇
登臨省識回仙面
茲來景物尤絕奇
江水江花淨如練
報詩中丞興不淺
更擬乘槎上霄漢

顧璘

荅徐昌穀博士

前年共飲燕京酒，高樓雪花三尺厚。
酣歌徹夜驚四鄰，世事浮沉果何有。
一為法吏少書來，心結愁雲慘不開。
昨傳學省移新籍，坐嘯空齋日幾回。

周別駕宅看花

周侯方庭大如案，四序種花香不斷。
日高散衙一事無，手汲清池自澆灌。
鮮英的皪珊瑚珠，密萼紛披紫絲幔。
芳根異種多難識，粉蝶黃蜂暗相喚。
西鄰迂叟饒閑情，

叩戶時來索花看
一來一醉酒千鍾
月俸依稀費多半
君侯莫厭頻來過
人生樂少憂患多
與君聚散同落葉
不醉花前將奈何

王韋

閣試春陰詩

皇都三月春正深
東風釀暖淑氣侵
曙光溟濛露華滿
輕雲閣日天沉沉
野色垂垂十餘里
草綠柔茵低迤邐
半空落絮濕未揚
百丈游絲寒不起
鶉鳩枝上相踏鳴

若與此景偏多情
空庭簾捲晝亦暝
隔牆惟見桃花明
小院門閑鶯自語
畫棟泥香燕初乳
苔花蒼潤上簾櫳
濛濛經雨還未雨
含情佇立憑闌干
遠峯漠漠登樓看
碧窗窈窕銀屏冷
金帳低回翠袖單
簷影頻移暝雲動
曲枕悠然醒午夢
起來小步倚閑階
花霧襲衣寒氣重
生意亨嘉春正時
造化於物若有私
明日晴光綠蘋轉
吾與萬物俱熙熙

鄭善夫

汶上對月聞笛作商調哀切命船人度曲為和
因賦醉歌

焉耆八月高風起鴻鴈羣飛渡淮水月下清砧愁遠人
天涯芳草思公子王郎哀時最蕭瑟萬里迢迢向南國
呼我上船設冰鱠仰天頌酒開胃臆關山茫茫何處邊
但見急管哀中天馮夷聽曲波面出楊柳亂落西風前
酒酣月落歌未已隴思江情嗒然起未掛姓名玉策上
願添海水金樽裏人生合歡那可測有似大海翻萍葉

回首親朋各別離
豈無江漢通舟楫
流光過鳥不復駐
達官好爵身之蠹
況乃豺狼橫地軸
何限驂騑窘天步
竹林諸賢皆酒徒
嗣宗只願步兵廚
古來賢達一嘶盡
醉鄉之托今何如

左國璣

別南塘子

五月麥熟繭綠絲
黃鸝啄榭鳴桑枝
南風送帆五兩急
吳江酒船初到時
牛車日轉曹門進
鼓市樓西集成鎮

金椎初破紫泥封，玉壺瀉出黃金嫩。當年交結十輩豪，
鞭撻揚馬雄風騷。邀遮直上酒樓去，意氣掃拂天雲高。
當樓豔婦調金瑟，袒博喧呼動阡陌。銀燭燒殘北闕星，
纖歌舞落西山月。風蓬聚散各沉淪，復見何人據要津。
五陵日月無精魄，鄉里衣冠有俊民。於今尚作紅塵客，
掉臂東華獻時策。恥逐童年走帝鄉，懶隨南鴈飛燕北。
聞君高誼非常流，意氣傾倒山為投。片言貴合黃金小，
一斛可散千春愁。嗟我生年已半百，種種顛毛欲成雪。

可惜晉間玉轆轤光芒猶見秋煙白閑來解贈南塘君
看我劍上搖星文不用千金荅高價但博鑪頭一醉醺
兩都詞賦何勞獻五軍大纛何須建一息春雷我自酣
百年事業君應見此回酒船何日來望君日上梁王臺
迷留且作鋪糟客未是千秋冠古才

送鄭冠玉

我攜白玉壺招邀黃山客三年隔闊此登堂笑我當時
欠情別晉間錦帶解龍泉手持素扇秋月圓酒酣把扇

求揮翰扇上昔有張生所畫南歸之彩船風林颯沓
露霜露煙濤微茫起汀鷺去者不去送者留立向沙頭如
有慙我心把翫未肯休恍忽欲動離人憂莫憂舊離樂
新會還見新會成離愁明朝我獻三都賦朔風吹雪燕
山路君臥梁州舊酒壚關山月苦看霜兔新離舊別俱
莫歌徒為勞心奈若何五雲散彩涼颼入且醉堂中金
叵羅

野堂餞陳子鎬之南都

我從夷門來送君金陵去野館離筵春晝晴楊花茫茫
幾千樹風吹亂撲金樽飛行人且解碧羅衣鳴箏送酒
勸君醉明日出門知者稀

陳彞

舟行入郡阻雪

江干雪暗停舟楫淅瀝風聲亂榆莢初如玉屑忽如羽
閑如柳絮忙如蝶蒼虬化作玉龍蟠吳山在望難登躡
烏雀無聲寂不飛瑤天一色行人稀爇爐酌酒吟未就

遙見漁人戴笠歸漁舟兩兩深夜雨折竹敲冰炊晚黍
月高雪霽烏號寒鴻鴈徘徊失沙渚醉來獨擁黑貂裘
夢入山頭最高處

孫一元

題梅花贈太守黃子和

使君作郡滄洲邊我曾一見神翛然長髯方瞳有仙骨
種梅猶記羅浮巔瓊盤鐵曲一萬本茅屋正在春風前
寒姿自照日杲杲白鶴下叫青溪煙我歸管領君勿嗔

采花拾實還候君

跨驢遊西山天竺寺

秋葉滿林吹亂紅
秋光半在山寺中
老衲迎門解幽事
一見呼我長髯公
薰爐相對坐終夕
松聲泉韻何冲融
獨鶴隔竹向人立
欲鳴未鳴幽意同
氣酣日落豪思發
詩成三繞青桂叢
造物小兒翫人世
俯仰何必悲無窮
布袍斗笠自高格
狂歌醉叫驚山翁
歸來明月散林影
驢背仰嘯秋山空

泛高士湖 并序

正德乙亥孟春十四日予與石川子泛舟西湖時
石川子著方山冠予戴華易巾被高士服把酒四
望予顧謂石川子曰昔青蓮居士李白與尚書郎
張謂泛沔州南湖因改為郎官湖今日予與子遊
頗追跡前事西湖可為高士湖矣石川子大笑酌
酒於湖命予作詩紀之予時已爛醉即信口長短
成篇不竄易一字

我聞唐家李白一世賢郎官之湖至今傳我今與子繼
其跡勝事豈許昔人專方冠野服興不減駕船載酒凌
蒼煙千山萬山兩岸如羣龍蜿蜒盡在几席前青天落
杯底白日行舟邊龜鼉突兀波面出大魚小魚爭避船
君把斗酒我歌扣舷天風下來雲葉翩翩爛醉騎鯨遊
崑崙顛

謝鮑山人採花見寄

山人縛屋黃山顛青松萬株盤屋前春風摘取花滿裏

逢人遙寄吳門仙
吳門仙人身已輕
服花更覺靈氣生
白日獨坐若木下
滄海如席龍不鳴
昨夢訪君松樹樾
赤脚踏雲石苔滑
天風颯颯吹欲醒
歸來松際留明月

吳偉瀑布圖

何人畫此瀑布圖
巔屋老樹雲模糊
風前披拂佇翫久
筆力乃是江夏吳
吳生當時名第一
揮毫落紙人莫及
骨格老硬神氣清
飛濤激石石欲立
懸巖遠勢亦可愛
直瀉似是廬山派
櫺葉瑟瑟天風來
晴沙碧嶼蒼茫外

美人隔水把瑤草鴻鴈雙飛鷓鴣小天寒日暮意無極
青石漠漠望中杳我生蹤跡真好竒年來遠結滄洲期
眼中見此足幽賞分泉煮石聊自怡

環溪釣處為陳憲僉題

長樂山水閩中雄諸峯北來開龍嵒一溪發源深何極
環繞却與諸山逢山根倒插溪水碧山靄冥冥溪樹失
鷓鴣鷓鴣啼向人四面波光山月出美人有時坐溪邊
竹竿裊裊牽春煙甬間苓箬興自好日暮吟對江花前

我亦平生稱釣翁十年避地滄溟東他日儻慕三花樹
萬里來尋煙霧中

春前五日大雪

一夜雪飛石徑齊清晨壓我茅屋低小奴開門抱甕出
赤脚汲水愁衝泥牆頭飢烏太無賴繞我階上啞啞啼
南山黃獨寒無苗長饒歸來風怒號

西湖山居

道人縛屋南山裏西湖正對柴門底藜杖經旬嬾出門

門前看湖聊爾耳秋風撫掌桂花開坐對白石歌隱士
溪翁住近不相知晨昏同飲西湖水

戴冠

丁丑道中聞鷓鴣

鷓鴣新啼啼且急草根露重聲如塞昔聞爾名未相識
今聞爾啼長歎息試問哥哥行不得何用一身生兩翼
羅浮遙遙雲似墨山高水深道多棘鷓鴣鷓鴣為爾淚
沾臆

楊慎

題夏仲昭竹寄陶良伯驥

太常曾次瀟湘寬少年愛寫生琅玕白頭藝苑更入妙
筆法近追王孟端兩家名藻雄吳下品題未覺風流亞
一紙能令百世傳兩竿不啻雙金價人言畫竹非畫工
草書結構將無同誰家高堂名寶繪徐熙花鳥迷青紅
玉人佳興松江東寄圖索賦隨長風遙知把翫清香裏
正是相思明月中

宿金沙江

往年曾向嘉陵宿，驛樓東畔闌干曲。
江聲徹夜攪離愁，月色中天照幽獨。
豈意飄零瘴海頭，嘉陵回首轉悠悠。
江聲月色那堪說，腸斷金沙萬里樓。

三岔驛

三岔驛十字路北去，南來幾朝暮。
朝見揚揚擁蓋來，暮看寂寂回車去。
今古銷沉名利中，短亭流水長亭樹。

送樊九岡副使歸新繁

別君於雲南碧雞之澤追君於東城金馬之坡酌君以
蓮蕊清麴之酒侑君以竹枝巴渝之歌天涯歧路鎮長
在故人零落渾無多憶昔君為漢陽守滄浪之清古無
有拂衣掉頭不肯顧飲水舊謠在人口明詔復起句町
行官突未黔先濯纓宦遊不博歸故里榮祿何如全令
名九隴高岡白雲野吾廬世耕在其下清冷好結鷗鷺
盟春秋願醉雞豚社蠻雨蠻煙老玉關小山叢桂不同
攀愁心如月何時掇夜夜隨君夢裏還

賦得千山紅樹圖送楊茂之

蕭郎雅工金碧畫愛畫碧雞與金馬畫作千山紅樹圖
行色秋光兩瀟灑搖落深知宋玉悲登山臨水送將歸
丹林初曉清霜重紫谷斜陽赤燒微故人辭我故鄉去
滇樹遙遙接巴樹桑落他山共醉時楓香客路銷魂處
白首遐荒老未還流波落木慘離顏錦城紅樹那能見
千里隨君夢裏還

山行即事

桐子花開映村塢單衣初試貧兒舞春寒已過四十五

垂楊篇

并序

楚雄直力橋有垂柳一株婉約可愛往來過之賦
此志感

靈和殿前豔陽時忘憂館裏光風吹千門萬戶旌旗色
九陌三條雨露姿蒼涼苑日籠燕甸縹緲宮雲覆京縣
芳樹重重歸院迷飄花點點臨池見臨池歸院總仙曹
應制分題競彩毫詔乘西第將軍馬時奪東方學士袍

金明綠暗留煙霧舊燕新鶯換朝暮只知睂黛為君顰
肯信胷肢有人妬從此沉淪萬里身可憐憔悴幾經春
支離散木甘時棄攀折荒亭委路塵搖落秋空上林遠
娑婆生意華年晚腸斷關山明月樓一聲橫笛清霜坂
方豪

太白樓席上追和先輩陳剛中

風流楊水部苦欲同登太白樓樓前一回首四郊煙霧
風颭颭白也生愛此死後神應留魯人徃徃聞嘯咏深

宵水底號蛟虬金尊綠酒滿玉鏡清光流起見仙人猶
獨酌錦袍坐對高城秋仙人從來小天地生既能樂死
何愁區區力士輩翫弄如沙鷗浩然之氣永不滅真與
元氣空中浮彼哉撼樹真蜉蝣只向仙人粗迹求仙人
聞之不滿一大笑飄然跨鶴歸宣州自言宣州亦舊游
避人議論莫若青山丘

冰玉篇贈徐子謙

君不見冰溪之水真如冰潔爽不得留蚊蠅玉山之峯

白如玉遙見貞光蕩晴旭我昔報恩作此行溪容山色
隨雙旌恍然置我水晶闕胷中塵穢皆銷歇嘉興太守
冰玉姿出門便與溪山期此日歸來五馬散意氣不異
之官時嘉興之人或未知溪童山叟皆知之童叟猶人
或可私山靈溪伯安可欺吁嗟太守真吾師相送豈作
兒女悲溪可漁山可采伐木丁丁歌款乃太守百年心
不悔獨恨生當明聖朝不應黑髮居東海野客狂癡全
未解欲走天門問時宰

贈寫真孫木峯

洞庭客子天邊來，木峯訪我讀書臺。
平生百念盡銷歇，惟有好畫心未灰。
長松高臥南風清，幅巾氅服神思寧。
呼毫為寫麋鹿相，兒童不識驚仙靈。
殷勤相送石溪渚，長揖分攜無一語。
但索狂吟滿意歸，寧計黃金漫相許。
依然挽袂酌一斗，山月已照崇陵口。
重開畫影笑相看，盡訝三人同酌酒。

棄瓢圖寄國英侍御

昔人棄國如棄瓢山中獨坐風蕭蕭
今我耽書好種樹虎谷崇陵未寂寥
我有知心在南海壺公名藥長自采
安得羽化相飛攀笑弄滄溟歌款乃

劉棟

幽居見雪呈學士董中峯座主

幽齋空鎖類禪關眷戀學士迴碧山
仰觀宿雲釀成雪倏忽縱橫遠近間
隨風鬚鬢驚素縷窺牖落鏡銷朱顏
茶鐺淨洗燃火急酒價減澀當壚閒
粗豪興發卒難遏

浩歌席地藉草管兔園持簡未成召陶穀滋味先援攀
旋看籬落莓苔後欲起遮護荒蕪刪衰柳向來弄玉筋
飢烏飛墜拋銀環意者凌寒有仙骨掩臥不覺月重彎
顧我山陰汎棹客驚馬不慣泥塗慳明發太陽融釋盡
扣衣函丈訂愚頑

齊之鸞

次韻題美人睡起圖

濃花壓枝枝欲偏晴日烘花花欲燃美人無事饒春睡

亂髮蟲蟲堆雲煙花開花落流光過不似沉香亭畔臥
別院春風自有花帶笑看花泛紫霞

浦口曉行

三五星短長亭日光烹海赤山色飲江青野燒林邊人
臂斧秋濤霧裏客揚舲

蔣山卿

大司寇金公芙蓉溪詩

丈人昔臥芙蓉溪芙蓉溪宛在涪江西一水縈紆帶茅屋

千花爛漫明沙堤
清秋落景森蕭爽
天遠滄洲愜心賞
霏霞裊霧時明滅
白鷗翠鳥長來往
此時吾亦愛吾廬
隱几青山獨著書
霄漢一朝通禁闕
煙霞萬里隔樵漁
君不見太公釣罷渭川閒
安石東山去不還
英雄事業與時會
棲棲豈在溪山間
雲閣崢嶸傍紫微
尚書侍從生光輝
佇看北斗調元氣
未許秋風拂素衣

望江大風雪與黃朱二子飲

三江與七澤微茫與天通
朔氣橫江來三日吹狂風排

山扇海欵缺裂一夜飛度匡廬雪黃雲萬里掣不開大
孤小孤安在哉雪花片片大如席洲渚玲瓏白盈尺遙
隨飛鴈沒長空凍壓枯松翻絕壁千艘萬舸依江頭停
橈住楫聊淹留且須沽酒與君醉莫因蹭蹬空嗟愁可
憐世事相反覆君不見今日北風明日休

竹谷詩為馬正甫作

終南何所有竹谷香回復秀嶺高連西華西洞壑遙通
曲江曲籠籬篠蕩千萬竿拂霧參天森似玉有時風雨

或蕭蕭入夏雪霜還肅肅扶風儒生馬季長灑落高情
媚幽獨忽然取適心神開來向谷中成卜築櫺櫓豈數
辟疆園虛靜應同子真谷藍田對長碧琅玕紫閣平分
翠色寒彷彿清飈聞雜佩逍遙素月窺檀欒先生少小
愛文詞老大猶無三徑資一行作吏廢此事南山竹谷
空相思君不見杜陵草堂埋草蕪輞川竹里成丘墟惟
有詩辭在千古至今歌詠成嗟吁嗟我今竹谷歌獨
無佳句將奈何

薛蕙

張南園畫雲南圖

嘗聞司徒作者流暮年畫思生滄洲丹青點拂隨興到
雲霧幻眇令人愁君不見益州形勝佳且殊可惜僻在
西南隅中原斷絕罕人跡遂使吳越矜區區司徒平生
生此都文學才氣海內無獨憐山水久寂寞因之貌作
雲南圖大山小山相盤拏龍鱗攢羅插虎牙洪波萬折
走其下石根奔蹙如蛟蛇行人含顰色咨嗟鳥道上被

青天遮巖拔谷坼有平地孤城百雉千人家生綃淡墨
勢頗窄萬里滇池氣相敵山川空闊神為開不覺沉吟
悲古跡古來此地號邊鄙邪指牂牁連越雋秦代新開
五丁道漢家更伐昆明水嶺陬海落通中夏翡翠明珠
半天下始聞大將泛樓船復遣詞臣祝金馬只今郡縣
窮南土風俗相傳勝前古世封刺史上計書附塞蠻夷
占編戶何況司徒此間出文獻從今更難匹山中已報
解銀魚世上仍看留綵筆我言此卷真奇最不獨毫端

工粉繪應同蜀相畫夷圖想見成周作王會

林春澤

羚羊峽二首

羚羊峽前風色高
羚羊峽口江怒濤
長年移棹維江皋
青山白水亦相盪
客心與爾同蕭騷

此生自信非蠕涎
風雲變態仍問天
何由跼跼驚飛鳶
扶桑斷石去不遠
銅柱高倚南山邊

送陽以道歸桃川

桃川子歸桃川朝發鳳凰臺夕指魚鳧天峨眉山月照
滄海巫峽溪風吹紫煙錦城西去桃滿川春風爛漫開
欲然落花片片隨流水青山悠悠不記年桃川主人好
歸去何用窘束坐自煎君不見封侯何人曲如鉤道邊
何人直如弦從來矩步難為用自古紅顏多妬妍君今
棄置勿復道且向桃川高枕眠赤霞潏潏波光泛看君
不異桃源仙

夏言

安鄉道中觀婦人插田

南村北村競栽禾
新婦小姑兼阿婆
青裾束臂白裹首
手擲新秧如擲梭
打鼓不停歌
不息似比男兒更膂力
自古男耕女專織
憐爾一身勤
兩役吁嗟乎
長安多少
閨中人
十指不動金滿身

許宗魯

至日偶然走筆

去年冬至堯母城
城頭較射角弓鳴
今年冬至毘陵館

凍雨寒雲歲華晚江南塞北風土殊何地何年是定居
愁端豈只如宮線一日長添千里餘

王廷陳

寄曹仲禮

吁嗟梁甫吟何哀白日黯慘浮雲迴繁華忽與東風別
幽壑不見陽春來憶初謁帝承明廬頗將詞賦追相如
意氣當時惟爾我文章絕代互吹嘘正逢漢武勤邊略
同奏文園諫獵書杞國憂天傾倚人笑為狂精衛枉銜

沙何裨海茫茫雷雨晦冥起倉卒散失非我能周防寧
知垂翅青天後虞羅獵矢猶徬徨予仍下獄大梁城謗
議雷同真吠聲全生虎口信不易一死鴻毛良可輕摧
眚覩面復苟活跼天蹐地長悲鳴前榮後枯嗟世事翻
雲覆雨見人情昔日結交二三子張口欲言禍及矣請
兵誰為哭秦庭擊筑何曾歌易水感君山嶽心不移張
公神劒合有時矯首南天瞻北極聊持芳草寄相思

豪士吟贈王氏

君家高樓臨漢水落日悲風白雲起門垂楊柳千萬株
長條直拂洪波裏我來繫舟古楊下秋深岸東蒹葭靡
此時歸思正鬱陶偶爾逢君行且止邀我置酒開綺筵
庖子擊肥兼割鮮海榴新擘寶房碎湘橘旋摘金子圓
翠袖成行獻歌舞授色知心次第前堂中食客多且賢
寶刀錦帶光接聯持觴遞進勸我酒四座為壽俱萬年
平原十日飲未足白日酣歌凌紫煙自矜膂力莫與伍
俠氣翩翩尤擅武角弓十斛左右張蛇矛丈八盤旋舞

櫪上生駒六駿姿猛士如林不敢騎控鬚鳴鞭一躍上
疾馳緩步衆稱宜男兒身手有如此壯節奇功皆可為
君不見道阻天寒行旅苦水有毒蛟山有虎請君殺蛟
兼射虎惡少紛紛安足數

馬汝驥

題長江圖

人間畫手不可遇那有江山入豪素吁嗟此卷誰所為
點染空堂滿雲霧虛無景象咫尺開萬里波濤天上來

似聽風雷洞庭落歛看日月岷峨迴煙靄微茫高岸圻
源潭掩映樓臺碧江中萬舸駕如飛颼颼風帆天不隔
奔湍逆浪勢莫止問爾舟師亦何喜虹梁縹緲錦石重
海嶽蒼茫翠煙起巖閣有人相對閒心疑鷗鷺杳無還
繞磴別圖幾遊侶杖藜捫葛同追攀天分南北壑長在
江水龍盤九州內一朝移置烏几前拂拭徘徊生感慨
我本滄浪垂釣者誰令載筆金門下夢入青山驚嘯猿
出吟紫陌愁奔馬見此倏然雙眼明臨流劇想濯塵纓

蓬萊扶桑儻雲接為借星槎犯斗行

王謳

宿三教寺有作

山高山深水聲聒孤林野寺秋寂寞玉兔霜毛永夜寒
白露青天下寥廓竹樵避虎放歌還林猿清嘯驚人落
三年持節客山東半世浮踪滿幽壑汗馬文章我不輕
畫形憶上麒麟閣冠蓋明時遭際難白頭天地傷漂泊

汪應軫

題百雀圖

百雀不如鳳胡為占琅玕朋雛碎語不可聽六月攪動
清風寒我欲挾金彈巧避千萬端徘徊恐落一枝翠矯
首待鳳棲闌干

張治

竹溪卷

君不見瀟湘萬竿玉君不見洞庭千頃秋蒼蛟夜舞風
雨黑鼉鼉日抱青天遊三年仗劍事明主君山衡岳空

回頭長安六月紅塵浮竹溪竹溪何清幽
安得載酒竹溪去醉臥秋陰看白鷗

李默

南劍程文學赴官富陽為賦短句

鼓柁何人過越西官程先宿富陽溪
江楓亂落翻紅蓼古道驚鴉出林杪
山堞行經風露餘千家橘柚霜黃初
褰帷屬發青陽轉桃李含煙足芳甸
蔬盤瓊席未為貧談經偃臥誰能嗔
松醪滿筯君自沃丈夫得意非梁肉

金史四庫全書
卷四十四
宮牆儻倚赤松山長跼仙人一扣關

周祚

吳偉畫冊為成中丞題

國朝畫師能悉數筆力孰過江夏吳眼前富貴王侯無
故能瀟灑超其徒或時酒酣赤兩足亦或脫帽空頭顱
五岳四瀆生斯須一峯忽從天際拔九派真見江流趨
中丞何由得真蹟列方布冊看有餘清秋示我閭山下
白日宛坐仙人區由來神物易飛去九苞之鳳不在笈

昨聞九月雷電作滄海恐失珊瑚株

教英

中秋對月

去年草堂對此月滿挹金波眺空闊正值龍沙罷鼓鼙
嬌兒幼女娛癡絕今年對月在長安萬戶西風砧杵寒
玉河橋東坐深閣無聲天漢流闌干禁城擊柝急相應
苑樹驚烏棲未定誰家玉笛最多情吹徹關山與愁聽
我欲殺死妖蝦蟇直使上下光無瑕歸來却酹玉川子

呼童旋煮先春芽

暑風亭餞客

石城上有清涼山暑風亭瞰山之曲攀雲與子偶同游
浩蕩憑虛恣延矚蕭蕭落木動寒聲隱隱迴汀帶殘旭
陰崖黑深山鬼啼老藤盤拏如縛屋六朝遺跡不可尋
長干冥冥花若沃古往今來感慨多閒情且付尊中綠
明朝子上鄱湖船桃葉渡頭雙濯足

汪本

園中躑躅

三月十日春已歸東家西家花亂飛我來此地作幽賞
祇有小種還芳菲問言乃是紅躑躅不比桃花李花俗
風和日暖池更清猩血淋漓灑蒼玉鶴林寺裏神仙家
昔年曾聞開此花後來已歸閨苑去不復與世俱驕誇
阿誰上天訴上帝移得此花在人世便當邀取七七仙
同飲壺觴對花醉

管浦

送顧宗朝還孟城

龍江木落風亂鳴
龍江水邊舟欲行
玉斝酒盡不成醉
青衫淚濕難為情
借問舟行向何處
美人別我淮南去
海天渺渺孤鶴飛
回首江東隔雲樹
高堂一笑壽且康
弄雛載戲斑斕裳
湖水梅花鬪清絕
尋詩載酒還徜徉
我欲東歸歸未得
風雨茅堂轉相憶
故國迢迢千里餘
雙鯉憑將寄消息

顧彥夫

南村題柳君宗鎬卷

崇文門外四三里茅屋數間村落裏犬吠花邊驚客來
鳥投樹底知風起主翁散步幽情多點簡畱畬早晚禾
歸來一飽有餘樂勢利炎炎如我何隔牆喚過鄰家叟
野菜隨時斟白酒酒後齊聲唱竹枝不覺檐前掛星斗

文徵明

采桑圖

茜裙青袂誰家女結伴牆東采桑去采桑日暮怕歸遲

室中箔寒蠶苦飢只愁牆下桑葉稀不知牆頭花亂飛
一春辛苦只自知百年能著幾羅衣

夜坐

幽人被酒夜不眠攬衣起坐垂堂前參差花影忽滿地
仰見明月流青天微風吹空星漠漠時有羈鴻度寥廓
美人不來更漏沉天南縹緲銀河落

題畫

溪雲冥冥溪雨急長空倒垂溪水立淩亂春潮萬壑搖

低迷暮靄千林濕，余生雅有滄洲適。
曾擁孤篷聽簫瑟，夢斷紅塵二十年。
江湖獨往興依然，偶拈秃筆掃東絹。
便覺吳松落并翦，金君家住雲水鄉。
朝煙暮樹對林堂，若為老去厭真蹟。
翻愛狂夫灑狂墨，就中妙解誰應識。
萬里雲煙開素壁。

采蓮圖

橫塘西頭春水生，荷花落日照人明。
花深葉暗不辨人，有時葉底聞歌聲。
歌聲宛轉誰家女，自把雙橈擊蘭渚。

不愁擊渚濺紅裳水中驚起雙鴛鴦

蔡羽

清涼臺

清涼寺裏清涼臺交巖互磴青崔嵬揚子江邊白鷺洲
白雲紅葉長悠悠都門蓮已落蟬聲滿城郭躋跳丹霞
端乾坤忽開拓霸陵黃屋翔青雲鍾山紫氣何紛紛秦
淮水接建章宮銅溝亦與寒潮通層樓累閣分朱邱王
第侯家相對起瓊臺砌斷金沙路鞦韆亦在青槐裏翡

翠常銜蘇合香鴛鴦只浴胭脂水繁華轉傷心今古多
升沉六代既冥漠南唐亦安尋水晶宮殿野棠開千門
萬戶生秋陰四望何茫然忽建城頭羽帆從采石來煙
分歷陽樹遙川動霽景碧草滅江渡銜杯不盡江南情
與君仗劍歌昇平

由大觀亭歷觀音閣仙釋二院並勝因得縱覽
江上

朱闌控帶青壁煙碧峯浮出丹楓顛東方鈴鐸西方磬

輕霞淡照橫江天南厓高北厓俯羣峯奔走如龍虎千
尋巨石連空來斷處曾經巨靈斧天池闊湯谷長秋江
萬里橫蒼茫漁舟尾掛金連環鴛鴦飛出蒹葭霜潯陽
潮有無白帝在何處回望吳天鴈南翔又西翥孤帆遠
映青空來綠樹橫分半江去重沙複岸東復張鯨鱷橫
斜失依據海月緣沙生珠子隨潮來殘陽尚懸壁素魄
先臨臺仙家瑤草九月寒遠公石上三花開燕子磯頭
飲牛客偶來莫使世人猜青山對酒誰為主惟有簫聲

晚自哀

覆舟山臨望

覆舟山頭霽景明
長松落落崖石平
迴巒秀嶺低復昂
傳聞此地為臺城
南望建章宮
佳氣何鬱蔥
秦淮樹中流
遙與宮門通
城中萬井如棋畫
楊柳煙中分紫陌
內園蘭桂浮溫香
戚里池臺蕩朱碧
鳳皇樓閣無處尋
臨春結綺作梵林
樽前却是樂遊苑
市朝更改成古今
登臨易頭白
銜杯落江日
迴望北湖煙
蟬鳴樹蕭瑟
秋波

慘澹荷芰花玉鳬錦雞踏浪霞西曹已鳴馬東署復報
衙冥冥壺底月寂寂城頭鴉停琴送盡飛鴻影引領天
邊不見家

春日雞鳴寺

江南楊柳空青青江邊路好無人行不知爛漫花何處
空聽嚶嚶竹裏聲鍾山王氣連宮禁臺城佳樹鬱春晴
獨領風煙無飲興晚來吹笛最分明

北門曉行

燭下銀塘流水長
馬前山色曉蒼蒼
朱樓未滅明河影
碧城已動晨曦光
雞唱悠悠度禁邸
螢飛點點刺衣裳
三年遊子離鄉思
閭闔門高露早涼

花村草堂為李子原承題

新河渺渺楓橋浦
百花叢中有香土
書生卜館面西山
十里清溪抱東戶
青溪抱東戶
水鳥羣無數
前朝勝境
開華洲
今代書聲讀芳杜
南峯高北峯俯
日日飛雲罨
窗廡上沙水下沙
土翠波粼粼織成組
我昔投宿堂背

樓前村夜過清明雨千巖發彩流朝霞茂苑騰光蕩碧
宇櫻筍煙籠文藻軒鵲岸送樓船鼓飛梁畫檻盤彩
虹菡萏湖邊女搖櫓宵長忽遞寒山鐘月落猶揮石牀
塵十年不上李子堂金陵城邊話江滸徒令風景形夢
寐何由復作花前舞題詩先寄花村主

徐霖

題畫

香爐峯高天削出湖面蒸雲欲吞日列仙上鑿煉丹臺

高人下築藏書室盤紆一道行者通民居僧寺有無中
斜陽影射樵斧白疎星光雜漁燈紅樓船風高殷簫鼓
去急不須人奮櫓栖禽驚散苦無情斷林賴有蒼煙補
人間此景何處看慘淡今從畫中見小皴大染設色真
粉本徒令工作眩書畫長留歲月過怪來歐公悔無多
南堂一賞到白髮快雨時晴縱嘯歌

謝承舉

贈客

紫貂壓肩酒薰面走馬章臺瞥如電石城送客雪滿舟
江閣張燈夜開宴雪花不飛江月明雲葉散盡霜天清
酒闌歌罷跨鶴去白雲東指瓊花城

題紫筠軒

南海岸邊玉作林江東城中土如金嬪嬙午夜寶階侍
鳳皇春曉丹山吟湘娥泣殘和淚洗竿竿灑濕胭脂水
青琅玕換赤珊瑚步障王家排十里翠幢導下姑射山
清風滿地月滿天

贈羅子實畫士

君提畫譜入神品不獨手模在心審予生骨相蹇且寒
笑比虞翻屯更甚雲臺麟閣慙少緣褒公鄂公儀凜然
烟霞痼疾老未愈蒲柳弱質秋堪憐山中耕讀性所愛
或投彩毫即把未請君為作東皋圖畫我看書坐牛背
松菴為滇南使趙朝進題

華蓋特撐天可參黃茅獨結棲幽菴孤標上屹紫矗矗
長蘿下掛青縿縿團藥覆蔭凝不散十里籠煙張綺幔

影金破碎月侵牀
屑玉玲瓏雪飄案
滇南鎮山名碧雞
美名古與金馬齊
山阿左紐十萬樹
雨淋日炙風淒淒
菴中主人寄玄靜
手翻典墳對賢聖
天心撫叱虬枝堅
持身節聳蛟鬚勁
大材端合柱棟梁
遮羅奎壁凌冰霜
蒼龍直拔九地起
綠鳳倒逐高雲翔
主人本是天水客
閉戶韜光謝塵迹
簷排戈戟聽琳琅
根養茯苓生琥珀
吁嗟乎何年山鬼
肆靈威驅龍移得
徂徠核

擬匡廬山瀑布泉送人還江西

水簾倒掛翠壁顛玉虬下吸金蓉天徐寅空歌素練舞
李白解道銀河懸石骨浸淫山脉水竇潤嵐蒸流不已
深源巨壑豈能容平漲鄱湖二千里

王寵

石湖中流酌酒酣暢

總道金門隱方朔何如東山臥謝安青雲萬里絕鳥道
凌兢側足千峯攢饞蛟磨牙走其下飛蛇接翼相勾盤
平生蕭散不經事清湖縱酒哀絲彈羅屏合沓出煙霧

金鏡滉漾生波瀾孤舟斷岸疑畫出菱葉荷花俱已殘
百觴自善鸛鵒舞九月不奈貂裘寒丈夫未用頗適意
長房自愛壺中寬君不見翠華搖搖滄海西長楊羽獵
闕旌旗子雲勞獻河東賦正是君平賣卜時

鄭作

荅空同子觀射見贈之作

我騎白鼻騶君載青油車行行城南道聯翩走風沙停
車下馬對相揖彎弓抽矢向西立一箭應手墮雙翼鏑

中颯颯悲風入天寒日暮侵征衣側身上馬先爾歸揚
鞭徑去不回首黃雲白雪昏霏霏

送五兄

崑崙之水流湯湯陌上行人愁斷腸霜寒露白心更切
況此飄飄秋葉黃弟兄河側重攜手流水何如別意長
寒坐憶李獻吉

雪花片片風吹過書生破屋甘飢餓去年甕頭新酒香
一尊兩尊遙餉我今年新酒中未漉甕底堅冰椎不破

此時知子更愁思擁被呻吟但僵臥

傅汝舟

登招山詩

招山不放海水過坐與潮汐爭咽喉軍門鼓角動地遠
不覺送我招山頭風沙冥冥海在下濤浪滾滾天真浮
一目可到九萬里寸心遙飛十二洲千峯盡處日脚動
百鳥絕飛雲色愁帆檣散亂點秋葉蛟龍出沒如獼猴
天門盪久恐將裂碣石漫過能不柔未知尾閭果安在

祇見萬水皆兼收將軍教我認絕域日本西戶東琉球

御選明詩卷四十四

欽定四庫全書薈要卷一萬八千五百四十五

集部

御選明詩卷四十五

七言古詩十

張時徹

江上春日

東風乍雨還乍晴十里百里聞流鶯
春波淼淼淨素練
春山簇簇行畫屏江上花飛已如霰
澤中蒲柳何青青
五陵俠客金腰褭瀟湘美人瓊玉筍
珊瑚寶玦照碧草

飛絲急管喧層城，綉服凌雲翡翠動。
香輪壓霧鴛鴦驚，日中鬪雞馳道塞。
日暮撾鼓紛吹笙，金陵美人鸚鵡杯。
桂櫂蘭舟不計傾，相看莫放赤日落。
白石青沙無限情，鳳凰臺上鳥初下。
白鷺洲前笛一鳴，歸途況值明月光。
回首猶聞白苧聲。

送陳子文之官廣西

城中月明齊擊鼓，城頭日出朝樹羽。
駟馬馳驅南楚雲，嶺猿長嘯炎交雨。
道傍三月柳如旌，攀折慙慙送子行。

白水蒼茫天萬里登臨不厭伏波城

沖菴詩為丹徒鄔封君作

延陵鎮上子真居種柳栽花繞屋廬生來不識王侯貴
高臥長披黃石書朝看北固雲夕眺江門月手攀青薜
蘿林鳥齊出沒龍目湖西招隱山桂子松花飛玉泉碧
草丹霞深歲月黃童白叟相周旋擊石磬調朱絃荷衣
雜佩舞僂僂鍾鼎玉帛豈吾意愧爾紛紛爭後先

陳都閭宅看煙火

正月初旬長晝昏北風吹沙江吐雲千門弱柳青裊裊
官院紅梅開正芬雨霽張燈春不遲將軍煙火夜偏奇
層層島嶼神仙見燦燦雲霄星斗垂寶塔峻嶒跨紫峰
青天削出金芙蓉芳蘭映日瓊瑤碧菡萏淩波瑪瑙紅
蠟炬光中戰馬鳴奔如飛電突如鯨戈矛寒帶陰山雪
旗甲晴揮瀚海星野鴿雙飛乍欲沒銜枝喜鵲喳喳發
芍藥葡萄懸翠屏珊瑚寶貝流明月空中捧出百絲燈
神女新妝五彩明真人斬蛟動長劍狂客吹簫過洞庭

翩翩舞蝶戲穿花海上樓臺散赤霞須臾錦繡被滿地
明珠斗大紛如麻城中小兒齊拍手聲聲道好如雷吼
擊鼓彈箏時轉喧河漢低迴掛朱牖夜深賓客各言歸
主人長跪強牽衣朱苞細拆漳南橘白椀新盛北地梨
聯牀接席出豐膳美酒平斟玉屈卮清宵良會豈再得
今我不醉將何為

顧夢圭

招盧駕部游西山

盧郎逸興古來少瘦馬年年躡芳草聞說東曹公事稀
山行須及鶯花好蕭條旅館製春衣拄笏西看冷翠微
與君明日即偕往醉看流鶯花下飛山中絕與江南似
恐為春光亂鄉思未得扁舟訪故廬且復聯鑣修禊事
人生百年幾日春休將黑髮戀風塵去年此地君曾至
想見鶯花待故人

高叔嗣

寄亳州薛考功

少年不識字持戟仕金門萬事蹉跎豈自料一官顛顛
與誰言上書昨日辭天子還從闕下歸田里束縛始自
重為人激昂尚欲酬知己不悟名輕世果然翻嫌計晚
身如此便爾深林學遯棲家貧那免伏耕犁腰鎌暮向
夷門北倚杖朝過莘野西伐木手營一茅宇披榛力灌
幾藥畦篋中筆硯無時把肘後詩書坐懶題往往頑癡
衆所疑悠悠端合困明時聞君解語五千字宅畔仙窟
定所知此日低頭應笑我平時開口却為誰

豐坊

贈太僕李遇齋北上

天門開佚蕩蕩風煙銷盡日月光負圖龍馬滎河上此
時誰不慕彈冠仗劍寧愁行路難吳江桃李迎錦纜長
安楊柳拂銀鞍君家高門百年舊近者詩名遍江右好
學常過司馬門時時酌我洲中酒我病吳山歲載徂何
能把盞臨前除贈君長鞭還四顧王良伯同今何如

蘇祐

贈謝山人茂秦

帝京一夜條風到御溝兩岸生青草黃鳥正牽求友情
間關隔樹流春聲珠簾繡襦未寂寞暖風猶怯羅衣薄
十二闌干清晝閒垂楊正裊憑虛閣三街六市車馬多
美人不來可若何日夕焚香望君至流水高山獨無意
為君先絃膝上桐相期共坐春風中一絃一酌不知曙
別君上馬朝天去

屠應竣

送林僉憲汝雨兵備潁州

虛庭落日明嘉林薰風吹我堂上琴故人言別赴河潁
使我不覺生離心援琴欲奏商聲沉感時懷昔多哀音
憶昔與君同侍輦奏書朝聞夕稱善扈聖親登太乙壇
承恩數奉甘泉宴須臾雲雨各西東北風栗烈南飛鴻
君度石梁看曉日予隨蘭省臥秋蓬故人才高人所羨
飛藻如煙爛如電建節鸞臺日月懸橫經彤署星辰爛
寒霜飛空淒北堂三年入謁來明光此時正奏甘露至

金莖不動天風香露乳
璚珠瑩飛雪松雲晝開暮還結
故人新自故鄉來應飽瑤華弄
松月夜談坐聽填填雷
驚霄碧玉翻空推閉門共讀祥異志
出門向人還語誰
九逵車馬朝來會共議明堂草書對近臣
新冊定陵功
常侍總承開府貴君不見人生得失難
自量天道盛衰
寧有常朱陽受節蘭蕙芳零露夕變
蒹葭蒼時來立取
封侯印老去猶為執戟郎又不見披裘採薪
登后車
篋在御朱桐虛歲歲南山叩哀角年年東觀著遺書君

行梁臺度潁水梁苑莓莓夕煙起汴水微茫晝不分惟
見邨原暮雲紫鳳城東山龍作盤萬年陵闕天南端黃
河千曲淨迴練蒼崖百疊竊高鸞此中騎士俱羆虎故
人有文兼有武嵩少雲生拂羽旂淮海風清雜鉦鼓煌
煌絳節坐臨戎俎豆長垂鼎鉉功縱使沙塲親校獵絕
勝芸閣賦雕蟲

馬上贈武舉生金寶

有序

金寶以歲庚辰舉武試時學士石公珪為考官今

廿年餘矣猶以敝衣走風塵中兵憲陳君令護予
行予憫之為賦長句

翩翩飛騎突且雄橐垂七尺高麗弓向予長跪馳素封
來自天津陳長公感君來緘重君使汝才且雄者誰子
云是熊峰門下士緋衣已隨塵土緇壯心尚逐風雲起
長公好士輕黃金求才不憚幽與深幕下立談收劇孟
坐中飛檄佇陳琳白髮自知無長物清商猶自有哀音
我聞其言感且歎古來相士輕貧賤驂騑豈少伯樂無

世上紛紛寧足羨曾冰皚皚黃河枯策勲報恩真丈夫
插貂橫玉盈上都封侯之骨汝有無贈汝腰間金僕姑

陸粲

賦內閣芍藥

金門柳色縈深綠上苑春餘雜花撲天桃已歇穠李衰
紅藥翻堦正芬郁此花初種自宣皇百曲雕闌七寶妝
融風窈窕昭陽殿暖日輕盈白玉堂玉堂學士看花早
賦成芸閣留詩草卷幔頻看碧霧流揮毫正耐紅雲繞

憶昨宣皇居法宮太平樂事君臣同宸遊每出濯龍裏

曲宴偏臨翔鳳中是時南苑飛霓旌爛漫仙葩綺繡明

臨風宛轉如矜妬俯者如愁仰如訴半沾微雨妖紅濕

太真泣凭闌干立至尊一顧六宮回齒裙霞帔俱羞澀

華萼樓頭雨露偏芳容贏得美人憐君恩為與分春色

詔許移來種閣前閣前複道連金谷翠輦經過幾回矚

內家敕進賞花詞昭容傳制黃門促沉吟此事六十載

當日繁華宛然在紺幃金輿絕幸臨黃扉紫荊留風采

不羨揚州寶帶圍
長安紅紫競芳菲
五侯七貴同邀賞
寶馬香車疾若飛
爭似名花出天上
霧閣雲窗儼相向
浪蝶遊蜂未許窺
酒徒詞客空惆悵
江南三月足豪華
繡幙圍香富貴家
亦有幽姿在空谷
風雨憔悴天之涯
燕山遊子江南客
獨對名花感今昔
草木何知人自憐
逢時亦復升沉隔
世間榮辱偶然事
不獨此花何歎息

送待詔文徵仲致仕

文星南指斗牛遙
先生拂袖歸江皋
平原蒼莽晨車發

霜天突兀玄雲高，憶昨先生登玉堂。
千鈞筆力開混沌，手翻翠虹霓翰飛。
赤鳳凰陰崖絕海垂，絢練文章不獨
詞林羨琴瑟。真諧清妙音，珪璋已備明堂薦。
却從綸閣夢雲林，山水長懸故國心。
燕山東望渺吳越，草堂何處聞風月。
茶磨峰前綠樹低，行春橋畔花如雪。
杖履今來續舊遊，顧盼溪山增秀發。
先生雅志追古人，有道何嘗羞賤貧。
平生氣與秋冥迥，未肯低眉事要津。
山巔水際從自得，龍騰鶴起誰能馴。
我師太常更清真，一官白首

從明裡

錢漕湖先生

諫書三上排紫閣釣竿歸抱漕湖濱共

爾完名宛雙壁況也意氣同膠漆丈夫要自能勇退人
生富貴何終極我曹何為空役役蟲臂鼠肝爭得失君
不見林屋山人名世才蔡九達幾年為客雞鳴臺消夏灣
前畫樓起木奴千樹煙花紫主人不來誰對此君歸儻
為寄雙魚好共相邀弄雲水

游大酉洞天

疇昔覽山經名蹟稱大酉乾坤遼闊吳楚長倚劍青冥

只翹首誰云萬里今獨來快意茲游信非偶主人亦清
真同余紫霞想旋披榛莽度巉巖細窺陰洞琅玕長側
身初下覺黯黑却立斯須忽爽朗千年古璧玉為色垂
乳晶熒翠猶滴仙人去後石函空綠煙銷盡藏書室金
燈閃倏知有無瑶草紛蕤亂朱碧吁嗟此竒觀乍到神
欲竦盤渦嵌竇深不測鳴流淺瀨驚奔瀕臨厓拄杖聽
猶疑白晝或恐風雷動我從放逐西南陬裹糧偏入名
山遊桃源逼側嶽麓小眺遠未得開雙眸終然靈境諧

夙好造物似為畸人謀
根盤路轉更礪砢
石田如掌琪花
彈奮衣欲往心翻然
水深泥滑愁無那
何當秉炬破幽暗
淨埽雲牀相對坐
高秋晴日儻更來
待余為啟青銅鎖

袁袞

送陳少參魯南之江西

金章荷聖恩辭出大明門
驛路雲千里都亭酒一尊
康郎城邊春水發
滕王閣上懸新月
輕帆直下疾於飛
幾

日看山遍吳越揚雄白首薦公車曾作詞臣侍石渠直
道自甘終放棄高才誰肯借吹噓藩參四品官不薄豫
章猶勝長沙惡簿書錢穀亦何勞十載功名至方岳春
來彭蠡鴈難聞江草江花香暮雲南歸正及鱸魚美直
北相思不見君

送陸子玄遊泰嶽

有客手珮蒼精龍告我遠遊登岱宗岱宗根盤九百里
絕頂上有秦時封金泥玉筍秘難見古文奇字誰能辨

日觀遙看碣石津雲峯正對蓬萊殿海中鰲身應天黑
三山湧出神仙宅貝闕參差結蜃樓珠宮掩映藏蛟室
君登泰嶽觀滄海九州四瀆皆安在堂上遺音想絲竹
壁間經傳尋魚亥丈夫所志在蓬桑焉能局促籠中藏
看君一劍行萬里五嶽之遊自茲始

趙時春

望太行

望太行險崔嵬連峯排河漢延袤亘絃垓風生虎豹谷

霧隱蛟龍堆羊腸碣石相陰翳唯見黃河雲外來左盤
右旋天地轉靈洞石門日月開紫芝白鹿久寂寞丹崖
素壁無塵埃萬山參差橫參氣紫陽真人安在哉古道
淒涼不可問時時山鳥自飛迴

王慎中

送儀部二寅長克選送貴嬪使

春風澹蕩江如綺樓船一道通易水近川花柳盡容華
為過佳人若桃李節旄前路光輝擁受詔採擇復克送

合相當知偃月形問祥應有懷日夢君王正在柏梁臺
歡進千年紫玉杯太史占天先入奏二星遙扈四星來

松江莫生廷韓遠來見訪比歸賦贈

文彩翩翩正少年機雲以後仍生賢已見馳聲嵩洛下
却來吟眺楚江邊扁舟泊近西淮柳客舍時沾南市酒
路菓紛投駿馬前山衣寄換新鶯後風流絕世美何如
一片瑤枝出樹初畫舫夜吟令客駐練裙畫臥有人書
敝刺蒙茸懷袖裏入門相訪睂間喜非才遠謝漢中郎

率爾為君行倒屣

題畫

繡壁峻增森怪立虬松夭矯相攫執脩髯怒甲爭奮躍
灑淅疑乘風雨入蔦蘿蒙密晝長陰雲氣淋漓晴亦溼
複礪兼藏嵌竇深空林恍聽濤聲急在谷幽人不可招
白日此中容易匿

唐順之

己酉八月十八日觀潮作

秋空忽爾色黯黯萬竅怒號山震盪冥冥混沌一氣來
游人共指潮頭上初時映海色尚微及至摧山力漸壯
湏洞吳越懼一壑幻戲人獸驚殊狀滿空煙霧走玉龍
萬里川原飀白象雷鼓鞀鞀馮夷舞日車出沒鮫綃漾
海神珍寶不自惜歲與江妃一相餉須臾漲盡勢稍歇
依然宇宙回清亮昔人說此已愈疾何況臨流恣疎放
同院僚觀閣中牡丹作

西掖衡連翡翠城籠煙裊霧百花明祇謂紫薇方吐萼

忽言紅藥已敷英紅藥葳蕤艷盛陽萬年春色在文昌
寧同鄴下芙蓉苑詎比洛陽桃李塲裁成異辦千般錦
纈就同心一樣黃金閣披時渾是畫綺樓凝處并疑妝
濯枝故向鳳池上裊露偏依仙掌傍仙掌嶙峋對鳳池
詞郎侍直鷺鴛齊玲瓏玉佩花間映飄曳羅衫葉下迷
花間葉下情無極含笑含嬌似相識羞將雞舌鬪馨香
欲取鷄冠並顏色翠幕分看態轉新朱欄斜倚不勝春
未採孤根助靈液聊持芳蕊贈佳人

陳東

賦得上林鴈贈吏部王郎中謫毗陵

八月涼風動雙闕
嗷嗷旅鴈雲中發
遐飛遠響激清音
刷羽振衣度上林
天邊結字行難亂
風裏傳書力不任
詎意上林重毛色
抱奇區區不察識
凌寒不借一枝棲
能鳴轉被單絲弋
逸志由來恥稻粱
歸飛耿耿背金塘
水咽驚聲疑箭落
月明避影怯弓傷
遙遙關路長辛苦
蕭條為向南中土
地闊山空不畏人
沙明水暖聊鳴舞

少年才客有王君把袂愁為失意分南去祇應聞鴈叫
臨風好是泣離羣

同李御史徐副使登廬山道中作

維舟問水境振策躡奇峯冥濛謝物外孤秀絕區中
峰連天自天直石磴崎嶇路不極開鑿空傳帝后功
險靈自識神仙域探靈勞頓登捫險損心情蒼崖忽轉萬
仞仄瀑水散落千巖聲巖深生夏寒澗複埋晝霧幽花
不記新斷石偏宜古時從樹底辨行雲還向雲中辨來

路九派遙音漸細微羣巒下瞰如翔赴別有青虹照碧
川香爐更在前峰前凌風揮手招五老煙霞却在衣衿
間玄竇青溪不可測紫芝白朮行當餐髓出何時遇丹
成幾日還我生膾有高深意結因況復逢初地待問遠
公可賣山換却春衫作歸計

吳子孝

玄寧觀夜集贈張子言

我不能奮身霄漢攀蛟龍手攬日月登玄宮揚帆浩溟

泛滄海玉芝若木空相待燕京骭骸誰與憐拜趨公府
心欲穿桂薪玉粟猶爭煬羸馬青衫愁著鞭虎額張侯
髯半雪綺裘繡帶腰環玦晦迹田生燕市豪藏名管子
遼東傑斗酒夜過玄寧觀按劍悲歌耳雙熱酒酣樂極
氣益振投瓊角勝雄三軍六緋的皪真堪羨宛轉瑤盤
走朱電勢窮一叱顏色同星爛渾疑鬼神變滿堂大笑
冠絕纓獲雋翻令肝膽驚張侯賀我浮玉觥隔筵交酢
了不爭嗚呼人生得喪何榮辱世事紛紛易翻覆塞叟

底須憂失馬鄭國焉知夢分鹿下堂罷酒客復醒春月
皎皎河漢清明朝却出邯鄲道回首徒含郭隗情

清明與孫都督伯泉出郊遊迎恩隆禧二寺觀
鄭尚書園池

將軍宿衛未央下歲改不知春草長連鑣出郭天氣好
細雨浮雲含日光清明花柳粲婀娜士女分明草間坐
陌煖遊人行不息煙深好鳥啼相和石杠流水帝壇東
玉岫蒼松佛宮左逶迤再入古道場貝葉塵生空影堂

日午鳴鐘看禮塔當年飛鞚憶穿楊漢家諸將誰第一
共說將軍勇無敵胸中禮樂輕儒生四海承平難請纓
金馬棲遲還落魄與子閒行寫心臆勲業長憐髀肉生
龍鍾却遣傍人惜人生不樂奈老何君不見今日山垓
昨朱戟鄭園池涸鳴蛙多碧桃欲開纏薜蘿美酒何時
對瓊瑟唾壺敲缺聞高歌

林應亮

江頭聞鶯

江頭煙柳拂梢低，無數新鶯相喚啼。
繚繞穿花清旭外，間關刺羽綠陰西。
鶯聲柳色自年華，却在寬閒野水涯。
空將律呂隨飄絮，枉對紅芳惜落霞。
幾羣爭得上林春，繡翮黃冠碧玉翎。
瑤臺似奏調鸞韻，錦樹如懸雜珮聲。
秦女停箏摹別調，燕姬罷吹按歌屏。
太液池宜春苑鳳，輦乘春行近遠總多。
百鳥寂無聲，喚取三春驚欲晚。
胡為清影在江鄉，巧囀微吟斷客腸。
淒涼不受黃金彈，搖蕩羞羈玳瑁梁。

落花篇

東鄰昨夜飛紅雨，落花如霰隨風舉。
千叢綴綺謝繁枝，九陌垂青隱芳樹。
憶昨芳妍乍放時，含娟凝艷騁容姿。
盈盈絳幘承曦暖，熒熒瑤英泛露滋。
地擬崑溟霞作幄，門連閭闔玉雕題。
崑溟閭闔非人境，喜得繁華薦清景。
共訝同心照日開，坐憐並蒂臨風整。
鳴絃伐鼓鬪春菲，列彩飛觴延晝永。
為君催曉下朱樓，為君歡燕淹華省。
華省朱樓春晝遲，雕欄色色自稱奇。
蝶翅輕穿翡翠筠，

龍柯誤觸鞦韆絲名園豈辨煙和樹名卉難分茵與芝
名園名卉色非一奪目瑤華紛轉日總多富貴衛張門
不讓風流王謝室風流富貴擅誰家照耀縱橫本自誇
別有仙葩吐仙種疑從瓊島泛瓊華綠晚斜攢珠蕊樹
玉盤遙掛赤城花萬斛香中貯甘露五雲芝上護流霞
霞飛露染春光暮東鄰遠客西鄰戍鸞鏡佳人愁裏看
鴈門征客暗中度此情難語北征人此情偏入東家婦
百轉鶯呼作怨聲一葉花飛減妝素鶯花歲暗可重新

節物朝來已非故
簇陌遊絲逐颺空
垂提空梗向流東
含香故弄妝臺上
襲暖偏留舞袖中
含香襲暖竟何處
乍入東牆復西署
悠揚未識飄零歸
寂歷如隨風雨去
乍驚葉萼忽辭叢
何況飄廊兼委路
隨蓬不戀故根春
衝燕寧知托巢羽
梧桐井畔映光寒
桃李蹊陰暮色闌
蟋蟀機殘催錦字
鳳凰樓迴乏青鸞
青鸞錦字總迢絕
見此令人心欲折
敗葉逢君可贈題
孤條感妾能生藥
掇葉攀條聊自持
迴簪轉黛顧容儀
茱萸錦上紅塵恨

楊柳聲中玉笛悲三千圖畫憐芳跡十二闌干凋翠睂
青苔忍誦薜蘿調紅樹曾題芍藥詩題詩欲寄遠行客
春風相憶故園陌瑤池千歲始重看錦瑟三春勿輕擲
周復俊

贈日者

蒲溪潭水五千尺潭上梅花清水石媚鳥飛來春自閒
晴峯靜對窗雲白軒中老人日抱膝肯向朱門分半席
長安或遇宋大夫葉覆清尊話昕夕

白悅

贈九峯鄒山人用同年沈子少泉韻

慧麓飛花繞松閣對君曾挹清泉酌江湖梗泛渺燕吳
十載相逢忽京郭空囊蕭索一錢無卿相珠璣爛盈橐
高懷嘯詠激清商夜月松雲唳孤鶴我昔乘龍及爾門
人琴寂莫悲今昨祖別同酣潞水筵春畦待我看栽藥

許應元

八月十六夜贈王湛塘侍御

昨夕中庭月微彩思君把杯何可待今夕逢君夜復昏
篝燈寥落對空尊古來萬事常如此人意天時不相似
碁局能禁清漏長高談無藉黃流旨愛君直道直如弦
白簡霜飛落九天謫向南華為傲吏應從麻谷濯仙泉
麻源華嶺古棲賢滅沒那知千載前無復顏公舊時石
空傳謝客遠遊篇顏公謝客皆安在
今其不歡後仍悔君將共命歸南都
余亦翩然向東海眼前翻覆無足憑
今日澍雨明日晴不見庾公樓上月
千秋還照武昌城

賦得章華臺送劉給事使楚分封

君不見楚王章華初築時
方城連亘匝天池
傾天轉地起臺榭
日月隱蔽星辰移
皮冠豹舄矜雄武
馳道離宮貯歌舞
美人爭惜顏似花
猛士猶聞力如虎
只知桂焰薰華屋
不道陂陀生灌木
簪履無復昔賓游
山川依舊開侯服
天王漢水起飛龍
赤社靈光照祝融
已準虞巡覲羣后
還循漢策廣分封
乘車遠自青霄下
朔雪龍旌颯霏灑
玉節初分碣石宮
廣樂先陳洞庭野
洞庭瀟湘

水拍隄迴皋曲岸思淒迷啼竹曾緘帝子恨紉蘭欲綴
侍臣衣侍臣給事明光裏子政才賢時罕比已知意氣
開衡雲還見篇章傾下里郢路燕畿萬里餘遙看三戶
壯黃圖歸來定有興都賦豈向荒臺怨久蕪

趙貞吉

魏公草堂

有才不到青雲前無心常傍白雲邊白雲青雲若流水
魏公草堂今在此嵐空煙斷鳥飛遲雪裏溪寒客路迷

庭前忽見幽香草揚袂臨風折一枝

春日遊華山

望華山迢迢千仞不可攀青蓮削玉浮雲外白雪堆鹽
翠靄間翠靄浮雲度飛鳥黃塵青鏡春風曉銀甲彈箏
芳草傍金槽壓酒垂楊道垂楊近拂枝芳草遠生滋夢
登天姥為金粟醒入西山採玉芝玉女洗頭邊金
粟金仙印掌前人從槎上新浮去舟載瀛東竟未旋雲
臺裊裊綠蘿裏中有一人談不死花外紅泉度晉人松

間華髮為秦語晉人秦語幾恬喧萬壑千崖老睡魂龍
爭虎鬪無窮恨狗盜雞鳴不足言雲歸廢時如流水塵
起巖關一千里髑髏臺上蝴蝶飛薜蘿蕪澗底鴛鴦起乍
聞歌動雉朝飛同游數子立斜暉待予暫解邯鄲急黃
鵠騎來住翠微

南津公館

南津嘔啞聞秋語濕籜黃蕉掩幽處關門夜開稻花香
瀾河曉洗流雲杼蘆笙含風滿簾花出門葭茨田麻麻

嬌猩葉舞一蝶墮似惜清翹浣花餓

夜飲郭宅分韻得寂字

土龍填湖小波寂星收闌聲光歷歷白鳥睡驚柘寒滴
葛輕公子巧中的蔗漿洗襟盈淅瀝青苧畦中坐束皙
城上割風學吹笛

王維楨

對雨篇

西山黯黯雲氣黑日落未落帶雨色夜深亂鴉九衢喧

轟雷厭城雨翻盆攬衣驚出莽四顧前屋後屋溜如注
樓頭鐘鼓不聞傳但聞玉溝濺濺波濤怒此時上御集
靈臺燭裏龍顏莞莞開平明筵張雨亦歇左右爭進萬
年杯君不見回枯小麥青社鼓賽神民樂生

劉繪

春夜省内寓直

月轉周廬映宿光煙飄漢署引仙郎初披御府黃門被
已接天衣侍女香窗前鐘報知長樂戶外鐘懸是建章

銀浦初飛披南館羽林宿衛周廬滿司隸陳兵入禁齊
相君留對歸家晚珠箔高褰動閤鈴金鑰乍懸傳漏板
虎觀氤氲雲半遮龍池鳴咽水全斜澹澹碧天遙度鴈
盈盈宮樹暗藏鴉露滴天街應鞞柳風迴上苑想飛花
丞郎清切連華屋夜深尚剪芸窗燭起草誰為諫獵章
抽毫並和陽春曲天長地久頌堯年萬國歡騰侍御筵
共道韶音博士奏還聞珍膳大官傳慙愧小臣空食祿
明朝宴會賜金錢

元夕同雜賓里中觀放煙火

銀漢低回度月華
瓊鉤寶柱綰燈紗
宛轉縈煙隨繡騎
徘徊照影逐香車
飛甍遙望如平樂
曲巷相逢似狹斜
百枝然火龍銜燭
七采絡纓鳳吐花
鳳花龍燭光銀陌
嬾童豔女連歌席
荷蓋亭亭葆羽翻
芝幢渺渺蘭輝燁
鴛鴦閣上舞飛仙
翡翠屏前淹醉客
樅金疊鼓轉層臺
絳火銀花映雜苔
乍見朱塵連霧捲
還看薰燧亂星回
赤燄忽掣金繩斷
丹洞齊烘玉璫開
蟠空百丈靈虬繞

簇幔千行紫蝶來紫蝶飛飛散簾箔流螢的的穿高閣
電影迎前霹靂驚瑤光綴後天花落扶桑波上浴奔鯨
蕊珠樹底翻丹鶴毒瘴薰時解麝膏殘霞翦斷飄芳藿
麝膏芳藿夜將闌蔓延劇戲幾回看鐵鉞燼銷歌曲轉
銅荷溜滴舞衣單鵲飛玄渚星河沒龍口流珠漏水寒
遙思內苑鰲山起噴煙射火春宵裏千旗萬隊繞西城
地轉天迴連北里豹脂熊髓照無休寶炬輕煙散五侯
羽林宅畔龍媒集虢國園中鳳蹕留翠焰金沙長夜宴

火桂炮鸞拂曙收魚眼搖燈半明滅虹梁霞縷黃昏徹
繁華富貴目前歡却笑媧皇補天裂可憐劉向只窮經
夜月春風不繫情翩翩公子嘗相問草閣囊螢誤一生

陳鳳

戴文進溪山春雨圖

林間雀聲急知有少女風溪雲挾雨至倏忽瀾春空霏
霏濕盡山橋路行人衝雨行喚渡沾泥涉險亦何為興
來疑向若耶去山環水遶路不分絕逕乃有逃名人貪

看秀色卷簾坐不覺嵐氣侵衣巾
林花落地半隨水流
向前溪猶未已新水纔添勢正雄
客舟多繫垂楊裏
意匠經營何太奇
空堂素壁迴含姿
恍然對此翻自訝
如在山村看雨時

喻時

登峨眉

瓊山沃沃多黃芽
珍殿巉巖半白霞
缺峯下瞰城為蟻
疊磴倒飛雲作花
南戒北戒擅奇麗
參星井星淪精華

八十四盤還絕嶮一百二關安足誇覽勝遠煩司馬跡
凌虛小駐薄延車女媧洞口坐何暮梅子坡頭興自賒
飛雪老巔不可到空臨珠閣愧金沙

章煥

醉翁亭漫題

醉翁昔醉醉翁亭翁醉還看翁自醒我來亭中翁已去
釀泉之水空泠泠相邀明月坐白石舉首青天橫翠屏
眼前有酒不能酌相逢一笑花冥冥

王問

閨情

月隱雕櫳光有無刺繡沉吟棲鳳孤空牀淒淒湘簾冷
愁心斷續隨金壺妾容誤比春花色朝來擷錦暮飛雪
留將鉛粉待君歸金鵲臺前不自識

呈李閣老

明星爛爛迴銀河紫微宮中瑞氣多勤政樓前曙色動
洞開闔闔奏雲和日臨虎陛黃金祀花映鴛聯白玉珂

共瞻玉柱承乾棟白日丹霄儼不動論道常參太上謀
風淳露滿琉璃甕朝罷委蛇下紫宸重瞳天子臨軒送
泰階六符光上浮古來相業惟伊周黃閣文章拖綠綬
出入四朝今黑頭願祈靈壽齊天歷千秋萬歲歌同遊

露坐觀星

秋風吹衣帶淒淒生微涼絡緯啼井闌玄蟬噪疎楊仰
觀河漢間星辰爛高張三台明泰階齊色儼成行朱鳥
藩臣位軌道向中央此時自許箕山隱少微含光射東

吟五斗曾經歎折腰歸埽松筠伴螻蛄蘿屋柴門逐浦
沙具區之上幾千家楂頭每斲銀絲鱸園內常生五色
瓜綺錯溝塍桑竹映山中豈解歌堯舜萬樹桃花洞口
迷春來莫遣漁郎問

贈別沈少坡寅長

白門柳花覆大堤東風吹來逐馬蹄征車迢迢君解攜
故人猶在鍾陵西鍾陵江頭落日低為君執鞭花下迷
憶君路傍春草齊到處交交黃鳥啼

陸師道

洞山

用張之
象韻

洞山虛中高揭脣白石齒齒排為齧引吸波浪氣吐吞
張吻露齧何鱗皴我疑巨鰲踞而蹲噉物未合口流津
人言中穹如覆盆我畏其舌不可捫盪舟強與闖其門
但見玉液涵靈根進穿石骨窺濤淪更訝鰲首承崑崙
柱支軸貫維厚坤仰看宇覆爛若銀卿雲一色紋魚鱗
引手歷歷捫星辰俯叩洞房深九闔中有神物雲晝屯

欲往探之路苦湮川祇山鬼司其閤何年有路通人神
往與一醉桃花春

何遷

邯鄲道中

呂翁祠前秋草衰邯鄲道上車輪迴青山一片市朝改
白日欲下朝歌隈平原客散趙宮廢魏家歌舞寒煙積
世間萬事春夢中枕邊豈羨仙人術吁嗟乎仙人一去
不復來洞簫寂寞青鸞哀黃梁踪跡俱塵埃行人夜渡

漳河水但見當年銅雀臺

顧源

覆舟山臨望

覆舟山頭霽景明長松落落厓石平迴巒秀嶺低復昂
傳聞此地為臺城南望建章宮佳氣何鬱蔥秦淮樹中
流遙與宮門通城中萬井如棋畫楊柳煙中分紫陌內
園蘭桂浮溫香戚里池臺蕩朱碧鳳凰樓閣無處尋臨
春結綺作梵林尊前却是樂遊苑市朝更改成古今登

臨易頭白銜杯落紅日回望北湖煙蟬鳴樹蕭瑟秋波
慘澹荷芰花玉鳬錦雞踏浪霞西曹已鳴馬東署復報
衙冥冥壺底月寂寂城頭鴉倚琴送盡飛鴻影引領天
邊不見家

胡安

有感

晴雲挂壁無人收時見樹影橫中流晚風借涼催夢到
一片明月依虛舟長江東流不可止宦海飄搖亦如此

斜風細雨歸去來誰知世有玄真子

江上

松間岸幘不知暑滿地花香夜來雨枕流漱石客未從
明月自隨波影去不倚清溪即對山正憐倦鳥帶雲還
朱門華屋多車馬何似幽人早閉關

江村

綠柳陰陰深幾許閒心欲共黃鶯語背指滄江坐晚風
客帆何事瀟湘去隔江煙柳掩孤村渡口飛花欲到門

自折松枝向茶竈客來應得當清尊

溪行

岸影映溪似溪淺溪光覆岸如岸遠扁舟盡日溪岸間
花香拂衣簾半捲興長不碍孤雲飛心閒恰與明月遲
漁歌款乃聲斷續有酒不飲當何時

無題

春到春歸不旋軫綠陰稠處花開盡泥中何得粘飛絮
牆頭忽見過新筍荒園落莫待我來小車久閣無人引

獨倚南樓待月明平生嬾作河陽尹

閨意

涼風動袖湖波起岸頭月影如秋水蓮房摘盡蓮葉低
含啼轉向芳閨裏征鴈還從北地飛山川何處不沾衣
應知薄倖思羅綺不著年年寄到衣

朱曰藩

飲吳一泓索題東方朔偷桃圖壽其鄉人因寄
是堂兄和成一卷

君不見方朔待詔金馬門舉朝不識歲星臣時時弄酒

戲萬乘賴有同懷郭舍人上書自銜匪碌碌已道三冬
文史足侏儒同索長安米社日先分大官肉姑孰吳君
天下奇風神藻雅予之師昨來傾蓋長千里斗酒論心
不復疑自憐骯髒滯江海客中深感君相待銅盤燒燭
夜未央滑稽尚覺清狂在酒酣書此圖落筆歌鳴鳴欲
煩青鳥使飛寄丹陽湖君不見漢皇當日宴西王雙成
起舞畫羅裳何物裳中能久壽十月金桃破鼻香

張居正

漢江

漢江東流風作波
南船北楫愁經過
舟師縮手抱雙槳
對客唱公無渡河
襄陽渡頭春可憐
襄陽城北花含煙
大堤高樓酒初熟
歡吟且駐木蘭船

恭題文皇四駿圖四首

錄二首

龍駒

鄭村壩大戰胸堂著一
箭都指揮楚楚拔箭

天馬來翼飛龍蹄削玉耳垂筒
碧月懸雙頰明星貫兩

瞳文皇將士盡羆虎復有龍駒助神武流矢當胸戰不
休汗溝血點桃花雨壩上摧鋒第一功策勲何必減元
戎君不見虎士標形麟閣裏龍駒亦入畫圖中

棗騮

小河大戰胸堂一箭後兩曲
池一箭安順侯托和齊拔箭

紫騮馬金絡月朝刷燕晡秣越俶儻精權竒超驤走滅
沒當年萬馬盡騰空就中紫騮尤最雄戰罷不知身著
箭飛來祇覺足生風北風獵獵吹原野長河水漸血流
赭誰言百萬倒戈中猶有彎弧射鈎者

徐學謨

廿八日喜雨作

東風脉脉催和煦
陡作春陰釀微雨
一年無日不愁乾
始見鄰家鉏菜圃
涓涓滴滴不停聲
流膏滲液潤春耕
但教四野歡農望
可卜明年米價平

李裳

胡明府書來道舊花園之游
憮然作歌

謝混游西池
休文宿東園
我曾醉臥君園裏
至今魂夢

猶騰翻當時春色初落蕾況有千金麗人在蕙蘭吐氣
光繞身一曲能令壯心改池水漣漪鏡靚妝盪金寶鴨
焚都梁陶然不知其處所但見娟娟花月來東牆人生
好會易睽闕一別楊花幾經歇嫩人眇眇春水長萬里
斜陽坐西沒

菊潭二首

甘菊之下潭水清上有菊花無數生谷中人家飲此水
能令上壽皆百齡漢家宰相亦不俗月致洛陽三十斛

遺踪蕪沒無處尋夜雨春風長荆穀

浩蕩李青蓮清狂孟襄陽當時各到菊潭上風杯對酒
酣壺觴山樹槭槭山菊老谷中人壽今多少高賢已去
碧山空千載流光一歸鳥

姜子羔

登峨嵋絕頂吟


君不見大峨之山矗西土乃在軒轅之臺列仙之府我
騎飛龍叩天戶九州歷歷皆可數初由平陸瞻青冥丹

梯翠磴愁攀登亦鳥伸而猿引斯颺舉而雲升下視大
壑不知其幾萬仞惟見長蛇尺蠖挂絕壁之蒼藤攀危
歷險趣未畢積雪陰風轉蕭瑟初疑雲自石中生寧知
日向雲間出普賢巖前雲日晴圓光倒照何熒熒眊然
五色相照耀有若虹蜺跨海掩赤城是非山澤氣無乃
陰陽精須臾雲散日西走光亦隨雲隱巖口對此喜極
心神舒聖燈又出南山隅初看一炬何趑趄少焉萬簇
皆東趨神奇鬼怪事殊絕銀燈火樹焉足娛歸來作歌

但坐嘯還問山靈有意無



御選明詩卷四十五



總校官庶吉士臣待朝
校對官檢討臣蕭九成
謄錄監生臣傅瓌芳